

24 uras per construir in roboter

■ (anr/sr) Questa fin da jamna ha la concorrenza naziunala da robotica liug ella Scuola cantunala grischuna a Cuera. La concorrenza per scolars dalla scola media – che cuoza 24 uras – vegn organisada dall'uniun Helveticrobot. La finamira da quella ei da motivar giuvenils en Svizra per la robotica. Ils 19 e 20 da schaner 2013 semesiran rodund 30 teams dall'entira Svizra e construeschan roboters. Duront dus dis survegnan ils participonts ella vegliadetgna da 13 tochen 20 onns la pusseivladad da far in'entschatta pla-scheivla el mund dalla tecnica. En

exact 24 uras san ils participonts sviluppar, construir e programmar sez in roboter. Sco ils organisaturs scrivon en in communicau da pressa va ei tier quella concorrenza en emprema lingia per saver far experientschas sil sectur dalla robotica. Ils megliers teams survegnan premis.

La Scuola politecnica federala (SPF) Turitg metta a disposiziun a Helveticrobot ils sortiments da construcziun necessaris per saver realisar la concorrenza. Quels «Kits da Lego NXT» vegnan era duvrai per la scolaziun da futurs inschigniers alla SPF Turitg. L'u-

niun Helveticrobot vul etabliar ellas scolas medias svizas la robotica sco camp da perscrutaziun. A media vosta dueien ulteriurs teams puder vegnir motivai da separticipar als campiunadis mundials da robotica. Dil davos campiunadi mundial han sulet duas gruppas svizas priu part. Cun quellas mesiras vul Helveticrobot far enzatgei encunter l'actuala munconza d'inschigniers en Svizra.

Aspectaturs ein beinvegni en l'aula dalla Scuola cantunala grischun, Arosastrasse 2, Cuera. A partir da sonda allas 11.00 tochen dumengia allas 14.00.



Ils participonts dalla concorrenza da robotica digl onn vargau.

MAD

En giacca blava allas cuorsas

Novas giaccas pils skiunzs dil Surselva Skiteam

■ (anr/gv) La cella da trenament ski alpin dil Surselva Skiteam fuorma ensemen culla Classa da talents dalla scola da Glion in center da prestaziun regiunal da Swiss Ski e presta en quella rolla schidadir lavur da pionier el Grischun. Florian Capaul da Val ei il cautenader dils giuvenils skiunzs che suondan ils fastitgs da Carlo Janka. Ensemen cun Thomas Sax ha el absolvii a sias uras igl emprendissadi da sportist. Thomas Sax ed auters menaders da Giuventetgna e sport sustegnan il trenader en siu engaschi.

La dumengia han duas cuorsas el rom

dil Cup Grischun giu liug a Tschappina e Rafael Berther da Sedrun ei daventaus secund e tierz ella categoria dils buobs U16. Cun quella caschun ein ils giuvenils skiunzs sepresentai per l'emprema ga sin camp cantunal ellas novas giaccas. Dapi l'entschatta da quest onn van els allas cuorsas en nova pareta. Gian Marco Menzli dalla fatschenta da sport Menzli Sport ch'ei era sponsur dallas cuorsas regiunalas digl SST ha surdau las giaccas ch'ei era la plattafuorma giavischada pils sponsurs principals dalla uniun tegala dils clubs da skis dalla Surselva. Quels sponsurs ein Axpo Hydro Sursel-

va, Raiffeisen, Candreja SA, Menzli Sport e Garage Caffisch SA. Il logo dil label dil Center da prestaziun regiunal da SwissSki fa medememein buna pareta silla giacca en blau.

Tier la sparta alpin meina il Surselva Skiteam era ina sparta nordic e Jan Berni da Castrisch ei il cautenader da quella truppa cun entgens sportists talentai. Ernst Sax, il president communal da Sursaiusa e president dalla Regiun Surselva, tgamuna il Surselva Skiteam. El ha surpriu avon treis onns da Mario Caviggli ch'era gest vegnius eligius commember dalla regenza grischuna.



Ils skiunzs sursilvans sepresentan dapi ina jamna en giaccas novas en blau. Gian Marco Menzli da Menzli Sport (davos seniester) ha surdau las giaccas ch'ei plattafuorma pils sponsurs digl SST. Davos dretg il president digl SST Ernst Sax e davon el il cautenader Florian Capaul.

MAD



La gruppa da nostalgia ha divertiu il publicum: Maurus Heini, Gieri Blumenthal, Cedric Wellinger, Yannick Caduff, Lucas Camathias, Romana Brunold ed Anita Hegner (da sen.).

MAD

Buna entschatta dalla Crap Sogn Gion Trophy

■ (anr/sr) Per schar reviver la tradiziun dallas cuorsas da skis popularas han la «Renngemeinschaft Alpenarena» e la «Weisse Arena Gruppe Laax» lantschau la sonda vargada la Crap Sogn Gion Trophy. Malgrad che beinenqual altra cuorsa ha carmalau sin pista quella sonda las skiunzas ed ils skiunzs ha la Crap Sogn Gion Trophy – ch'ei adattada per in e scadin – saviu beneventar biars participonts. Rodund 150 carschi ed affons han seschau entusiasmar per quella cuorsa che ha giu liug silla pista da Curnius tochen a Cains sur Falera. Ella categoria nostalgia han siat persunas priu part e procurau cun lur costums ed il stil dils perdavons per atenziun e bia risaglias dil publicum. Il skiunz il pli spert dalla categoria nostalgia ei Gieri Blumenthal staus, el ei arrivaus a Cains cun in temps da 3:32.123. Bia dapli temps han ils collegas empau pli cumadeivels duvrau. Duront la cuorsa han els fatg enqual pausa per buca vegnir all'arrivada miez morts dalla staundladad. Rischli, alias Gigi da Laax, ei arrivaus cun ses skis da lenn cun in temps da varga 13 minutas a Cains e Maurus Heini che ha aunc duvrau empau pli ditg suenter bunamein 18 minutas. Dil meglier temps dil di all'emprema Crap Sogn

Gion Trophy ha Aluis Casutt (1:27.567) saviu selegrar, cun pauc disavantatg ein Hampi Casutt (1:27.648) e Wendelin Casutt (1:28.762) vegni all'arrivada. «La Crap Sogn Gion Trophy ha saviu vegnir lantschada da bellezza aura e buna atmosfera, nus essan cuntents e sch'igl ei pusseivel lein nus cuntinuar l'auter onn cun quella cuorsa», ha Martin Candrian, il president dalla «Renngemeinschaft Alpenarena», declarau sin damonda dalla anr. La finamira da quella cuorsa seigi da schar reviver la tradiziun dallas cuorsas popularas e d'astgar beneventar allas proximas cuorsas aunc dapli participonts da lunsch e da maneivel. Cun ustria e musica live ei la fiasta vegnida cuntinuada la sonda sera en La Fermata a Falera. Per gudignar ils premis ils pli bials han ils participonts buca stuiu esser sco emprems all'arrivada, mobein haver il cletg che lur numera vegni tratga sco emprema ord la capiala. Aschia ha Markus Bösch da Laax saviu selegrar dil premi principal, ina vadijala ch'ei vegnida sponsurada dils purs da Falera.

La rangaziun e bia bialas fotografias dalla emprema Crap Sogn Gion Trophy ein d'anflar sut www.rgalpenarena.ch



Theo Candinas duront ina prelecziun ord la reediziun da Gion Barlac. Cun quella figura ha igl autor rut tabus e provocau babs e mummas, prers e mistrals.

FOTO S. ROTHMUND

Theo Candinas prelegia a Cuera

(anr/sr) La Chasa Editura Rumantscha e la Biblioteca populara Arcas envidan ad in inscunter cun igl autor Theo Candinas da Surrein. Gievgia, ils 24 da schaner allas 20.00 prelegia Theo Candinas ord la nova reediziun da siu cudisch da cult Gion Barlac. La prelecziun vegn moderada da Esther Krätzli ed ha liug ella Biblioteca populara Arcas a Cuera. L'entrada ei libra. Ils plazs ein da reservar tier tel. 081 252 61 40. Avon prest 40 onns ein las historias da Gion Barlac digl autor Theo Candinas

cumparidas. Gion Barlac ha duvrau las expressiuns duidas e buca tschintschau entuorn la buglia. El ha rut in tabu suenter l'auter e ladinamein ha il cudisch da scandal procurau per gronda agitaziun en Surselva. La «Gassetta Romontscha» era fullanada cun replicas ed igl autor e siu Gion Barlac fuvan el center dils discuers allas meisas rodundas. Dacuort ha la Chasa Editura Rumantscha reedii quei clas-sicher romontsch en ina versiun bilingua scretta e sco cudisch auditiv.